

Di dil Museum La Truaisch 2023

Igl ei danovamein stau in success per ils organisaturs da TujetschVIVAcultura. Rodund siatonta personas han priu part al di dil Museum La Truaisch, dumengia, igl 1. d'october 2023. Biars han nezegiau la caschun da vegnir a gentar e gustar la pulenta cun groma e caschiel.

Di dil museum ei era contemplar films da Tujetsch. Quella ga ha ina schelta da films da Tumaisch Monn delectau ils aspectaturs e las aspectaturas. Il pli bugen vegn mirau e gudiu las personas che cumparan ellas differentas scenas. Ils films ein dils onns 1970 e bia personas ein buca pli denter nus, auters ein semidai marcantamein enteifer ils davos tschunconta onns.

In spectachel dalla natira ein las mineralias. La gronda calamita ein las novas mineralias dad Ignazi Albin stadas. Il star da quellas ei senza dubi il grondius e perfetg mulau clar da Cavradi. La collecziun fuorman quarz da Cavradi e secapescha entginas alas fier e divers auters minerals. In péz brin porta ina tschenta da hematit ed il Milarit da Val Val da 21 mm fa honur all'entira schelta dil cavacristallas da Tschamut.

Plirs visitaders ein arrivai muort l'exposiziun speciala, quella dallas sculpturas da Tumaisch Monn. Las habilitads d'entagliar e las colurs fascineschan. Las treis alzadas cun cultura e historia motiveschan da star eri en mintga stanza e far in viadi ella veta d'antruras ed ella historia e cultura dalla val.

Il Museum La Truaisch ei aunc aviarts entochen la fin dil meins october.

L'exposiziun speciala va lu a fin. Perquei prende la caschun da visitar nossa cultura egl arcun da nossa val.

Igl ei stau igl otgavel di dil museum che duei restar vinavon el program da TujetschVIVAcultura. Ils organisaturs engrazian e selegran gia oz sin l'emprema dumengia d'october 2024.

Tarcisi Hendry

